

四庫全書

史部

欽定四庫全書

史部

皇朝文獻通考卷二十六

內閣中書<sub>臣</sub>寶汝翼覆勘

總校官中書<sub>臣</sub>孫溶

欽定四庫全書

皇朝文獻通考卷二十六

征權考一

臣等謹按馮端臨征權考紀述權政為目有六曰  
征商即闔市之征也曰鹽鐵則管子正鹽筴之說  
所造端也曰權酤自漢時征之曰權茶曰坑冶皆  
自唐時征之曰雜征歛自山澤津渡以及坊場牙  
契因事並見至宋代經總制錢月椿板帳並著於

是雜征云者不可以類舉也蓋自周易有重門擊柝之文周禮司關掌國貨之節典其治禁以便訶譏而安行旅凡貨不出於關者舉其貨罰其人其餘川澤林藪各有專司所以崇本抑末使民歸於南畝經制所定在昔為然秦漢相沿至唐宋而加密竹木間架及坊場撲買未可縷述降及明季以軍興餉絀稅額屢增惟我

國家肇造區夏蕩滌繁苛與之更始



列聖相承如傷厓念自惟正之供屢經蠲免而外言闔市則

溫綸告戒至再至三惟恐司權之臣乘勢以取贏也論  
鹽法則加引加觔以紓商力因時因地以恤民艱  
惟恐釐政之臣厲民以自封也至酒醪麋穀則惟  
燒鍋躡麴是嚴而不專設權酤之務五金產地則  
以聚人生事為戒而不計及礦稅之饒他如寬漁  
課以卹濱海之民定牙契而嚴胥役之禁所以為

小民計者至周且渥夫貨惡其棄於地而地廣則  
民用益饒我

皇上西睡底定拓疆二萬里內地商民持布幣而往者  
輪蹄萬計薄征減稅道路歡呼商賈市易之地已  
倍廣於向時而征商之額未嘗重加於昔日伊犁  
闢展烏魯木齊葉爾羌喀什噶爾等處凡有市易  
之地畧征其稅二三十分之一以慰新疆赤子食  
毛踐土貢芹獻曝之心初非利所有也臣等謹依

類纂集考

國朝之故實合以馬氏之舊文而變通之首關市次  
鹽法又次權酤權茶坑冶而終之以雜征凡六卷  
惟是馬氏沿漢時故事合著鹽鐵今則以鐵屬坑  
冶而不繫於鹽私榷之禁我

朝不列於令甲既為權政所蠲除則節目應歸於簡  
易因並去之以明紀載核實之義焉

征商

關市

本朝

太祖高皇帝丁亥年與明通市於撫順清河寬奠驍陽四

關口是時

上招徠各路國勢日盛明亦遣使通好歲以金幣聘問我國所產東珠人參紫貂元狐獐狸獾諸珍異之物於撫順清河寬奠驍陽四關口互市以通商賈

天命十一年定漏稅私商之罪奉

諭旨通商為市國家經費所出應任其交易漏稅者罪之

若往外國交易亦當告知諸貝勒私往者罪之

順治元年豁免明季各項稅課虧欠

又免各直省關津抽稅一年禁革明末加增稅額  
銀兩免順治元年關津稅課自二年正月初一日  
以後方照故明額起稅凡故明末年一切加增稅  
額盡行豁免其直省州縣零星抽取落地稅銀名  
色概行嚴禁

二年禁革陝西省落地稅銀

又定蕪湖等關抽分例工部奏言蕪湖杭關龍江  
荊州清江五處每年例抽稅銀計十二萬九千六  
百三十一兩四錢有奇請差本部官抽分從之  
三年革明季加增太平府姑溪橋米稅金柱山商  
稅安慶府鹽稅

四年歸併荆關通惠河中河清江厰杭關蕪湖龍  
江等關於戶部

又定閩浙收稅例並禁明末濫征私稅閩浙關津

抽稅經明末疊增數倍原額戶部奏定照萬厯年間原額及天啟崇禎遞增額數一半征收杭州南北二關先已差官其餘自順治四年正月初一日以後俱照此例一體抽征其州縣零星抽取落地稅銀名色及閩省勢官土豪不肖有司向來津頭牙店擅科私稅概行嚴禁違者罪之

又定關差滿漢員數戶工二部十九處關差漢官外增設滿洲官十九員漢軍官十九員

又定張家口等處關口開塞事宜戶部兵部奏差  
理事官科奎鍾固自張家口起西至黃河止察得  
張家口關門迤西黃河迤東共一千四十五里共  
應留臺二百四十四座故明時得勝堡一口係察  
哈爾國討賞出入之路河保營係鄂爾多斯部落  
茶鹽交易之處以上二口俱已堵塞又差理事官  
滿都戶等自張家口起東至山海關止察得張家  
口迤東山海關迤西共二千四百四里共應留臺



四百一十七座洪山口龍井關口西常峪正關口  
潘家口冷口俱係捕魚網戶耕種往來之路密雲  
迤後石塘嶺正關口係民間運木之路昔戶部於  
此按枚抽稅以上應留關口共六處外如常峪口  
獨石口龍門所口墻子嶺口黃崖口羅文峪董家  
口劉家口桃林口界嶺口一片石口以上十一關  
口俱已堵塞得

旨河保營既為鄂爾多斯部落交易鹽茶之地與董家口

俱准開餘如議

臣等謹按

國家設關置尹掌其治禁本以譏察奸宄而安行旅  
非徒徵商抑末用佐經費已也山海關外在我  
朝本為內地然內外人民往來關口未嘗不稽其出  
入之數異言異服非有勘合驗放者無所容於其  
間今自張家口至山海關較諸故明所設臺座減  
十之七八而攜帶軍器有禁夾帶私參有禁屬國

朝使持禁物出關亦有禁當茲中外一家仍寓重門擊柝之意是以關口開塞與臺座興廢之故仍備著於篇云

六年嚴禁各關差收稅例外多徵戶部奉

諭旨設關徵稅原寓稽察奸宄之意非專與商賈較錙銖也爾部行文各關滿漢官員以後俱照原定則例起稅如有徇情權貴放免船隻乃於商船增收或希充私橐例外多徵以病商民者一經查出定行重處

八年減定關差員數先是各關差期滿回京戶部  
行咨吏部議叙銓用而關差員數遞增攜帶書吏  
多行不法

上深知其弊

諭吏部權闕之設原有定額差一司官已足何故濫差多  
人忽而三員忽而二員每官一出必市馬數十匹招募  
書吏數十人未出都門先行納賄戶部填給糧單沿途  
騷擾鞭打驛官奴使村民包攬經紀任意需索量船盤

貨假公行私商賈恐懼不前百物騰貴天下通行河道  
何以至此朕灼知今日商民之苦著仍舊每關設官一  
員其添設者悉行裁去以後不得濫差其裁缺撤回之  
員既不利於商賈又何利於州縣之民戶部不得妄咨  
勤勞吏部不得更興銓補國家愛惜牧民之官豈得仍  
前朦混爾部謹識朕諭實心遵守毋負朕通商愛民之  
意

九年定直省典舖稅例在外當舖每年定稅銀五

兩其在京當舖並各鋪仍令順天府查照鋪面酌量徵收

十一年准科臣所奏清釐關弊戶科給事中杜篤祐條奏清釐關弊四事一裁吏役一查稅累一闢差迴避原籍一批文核對限期章下所司遵行

十八年定張家口殺虎口兩翼稅額張家口稅額每年一萬兩殺虎口稅額每年一萬三千兩兩翼稅額每翼一年六千兩

康熙二年定盤詰糧船關口地方戶部議覆漕運  
總督林起龍條奏漕運重船原令各關盤詰夾帶  
私貨但關口甚多處處盤詰必多悞運應如所請  
止於儀真瓜州淮安濟寧天津等五處地方嚴加  
盤查又運丁舊例每船許帶土宜六十石恐南北  
關司概作私貨查每船土宜載在議單應仍許帶  
以恤運丁勞苦從之

四年罷抽稅溢額議叙之例令各關稅務分別

差遣戶部司員及地方官兼理奉

諭旨各省設立關稅向例將抽稅溢額者加級紀錄遂致各差冀邀恩典困苦商民嗣後稅課俱照定額征收缺額者處分溢額者加級紀錄之例永行停止其輪流差遣部員亦應停罷并稅額作何征收著議政王貝勒大臣九卿科道會議具奏嗣後議定京城左右翼張家口殺虎口四差不必輪差六部官員止於戶部司員中輪差管理其崇文門稅務歸順天府治中兼理



天津鈔關稅務歸天津道兼理通州稅務歸通薊道兼理居庸關稅務歸昌密道兼理

又嚴禁各關違例收稅及遲延捐勒之弊奉

諭旨各省關鈔之設原期通商利民以資國用近聞各處收稅官員巧立名色另設戥秤於定額之外恣意多索或指稱漏稅挾詐過往商民或將民間日用瑣細之物及衣服等類原不抽稅者亦違例收稅或商賈已經報稅不令過關故意遲延捐勒遂其貪心弊端甚多難以

枚舉嗣後凡地方收稅官員俱著洗心滌慮恪遵法紀如有前項情弊在內科道官在外督撫嚴察叅奏從重治罪如督撫不行叅奏別經首發即治該督撫以徇縱之罪

五年議准刊刻關稅條例豎立木榜於直省關口孔道曉諭商民戶部議覆直隸巡撫王登聯疏言直隸各省征收關稅條例甚屬繁多請刊刻木榜豎立關口並商賈往來之孔道徧行曉諭或例內

有加增之數亦明白註出以杜吏役濫征之弊應如所請嗣後直隸各省設立關稅之處應多刊木榜昭示商民照額征收如有不肖官吏於定額之外私行濫收者令該督撫不時查察據實題叅依律治罪從之

又定居庸闕每年稅額銀三千兩

又停罷崇文門出京貨物稅課

六年議定淮安關及直省各關稅務俱委專員管

理戶部議覆河南道御史徐浩武疏言江南淮海道專管海防地方事務俱停其兼管其淮安關稅等項亦應委員管理應如所請并行文直隸各省將各關事務俱委專員管理從之

又命杭州府同知管理北新南新兩關事務

七年命浙江鹽運使管理北新關事務

八年議定各關稅務分別差遣部員及地方官管理戶部議覆戶科給事中蘇拜疏言關稅一差歸

於外府佐貳官管理但各官俱有專掌又兼理關  
稅事務煩多且身為地方官畏懼上司希圖足額  
必致增派商民請仍差部員應如所奏將滿漢司  
官專差收稅奉

諭旨關稅多者將各部院賢能滿漢官員差遣關稅少者  
仍交地方官征收其應差部院官與應交地方官之處  
分別議奏戶部再議查崇文門稅差已經設官收稅其  
通州坐糧廳京城左右二翼倉寶泉局大通橋通

州西倉中南倉張家口殺虎口此九差原係臣部  
官員差遣應仍舊例外許墅關蕪湖關北新關九  
江關淮安關太平橋揚州關贛關天津關西新關  
淮安倉臨清關鳳陽倉稅額俱多應擇各部院賢  
能滿漢官員差遣其它運廳居庸關徐州倉稅額  
俱少應交與地方官征收從之

又定部員關差掣籤例戶部議覆御史黃敬璣疏  
言各省關差缺出於部曹中選用賢能止可為一

時破格之舉行之既久恐有營求之弊請照舊例  
挨資俸掣籤應如所請闕差缺出將六部俸深官  
員咨送掣籤其差過之員不准重差從之

九年裁江南西新闕戶部差歸併龍江闕工部管  
理江南蕪湖闕工部差歸併本闕戶部管理

十一年更定闕差員數減戶部工部闕差員數照  
鹽差例不論滿洲漢軍漢人序俸掣籤每闕差司  
官一員筆帖式一員

十二年禁直隸各省官吏無得私稅市貨

十三年以江南鳳陽等三處倉關事務歸併地方  
官管理江南總督阿席熙疏言鳳陽倉額稅本折  
錢糧歸併鳳陽府知府管理正陽關稅歸併通判  
管理臨淮關稅發大使征收停差部員部議應如  
所請得

旨允行

二十一年移九江權關於湖口縣先是給事中雅



齊納條奏請將九江權關移於湖口地方九卿兩  
議並奏

上命畫一定議尋九卿議覆暫移九江關於湖口收稅以  
一年所得為定額如有不便具題另議從之

又停止差遣潼關收稅部員先是潼關額稅有司  
征收七千餘兩康熙十九年遣郎中數多禮督徵  
得稅四萬餘兩至是奉

諭旨數年以來秦省兵民苦於輓運潼關收稅仍照舊額

著停止差遣部員

二十三年議准浙江沿海貿易收稅例九卿等議覆工部侍郎金世鑑疏言浙江沿海地方請照山東諸處見行之例聽百姓裝載五百石以下船隻往海上貿易捕魚預行稟明人數至收稅之處交與該道計貨之貴賤定稅之重輕按季造冊報部應如所請從之

又定開海征稅則例其海口內橋津地方貿易悉

免抽分九卿等議覆戶科給事中孫蕙疏言海洋貿易宜設立專官收稅應如所請得

旨海洋貿易創收稅課若不定例恐為商賈累當照關差例差部院賢能司官前往酌定則例嗣經郎中伊爾格圖酌定開海征稅則例奏請給與各關定例款項於橋道渡口征收稅課奉

諭旨向令開海貿易謂於閩粵邊海民生有益若此二省民用充阜財貨流通各省俱有裨益且出海非貧民所

能富商大賈懋遷有無薄征其稅不致累民今若照奉  
差郎中伊爾格圖所奏給與各關定例款項於橋道渡  
口等處概行征收何以異於原無稅課之地反增設一  
關科歛乎此事恐致擾民爾等傳諭九卿詹事科道會  
議具奏戶部等衙門遵

諭議覆福建廣東新設關差止將海上出入船載貿易貨  
物征收其海口內橋津地方貿易船車等物傳具  
抽分并將各關征税則例給發監督酌量增減定

例從之

又議定通惠河稅差照例掣籤三年更換戶部等衙門會議僉都御史趙之鼎疏言通惠河一差每年帶征稅銀有議叙之例應歸入各關內將部院衙門官員照例掣籤三年更差應如所請從之

二十四年免外國貢船抽稅福建總督王國安疏言外國貢船請抽稅令其貿易部議應如所請得旨進貢船隻若行抽稅殊失大體且非朕柔遠之意悉免

之

五見市  
糴考

又酌減洋船丈抽之例監督伊爾格圖奏言粵東  
向有東西二洋諸國往來交易係市舶提舉司征  
收貨稅明隆慶五年以夷人報貨奸欺難以查驗  
改定丈抽之例按船大小以為額稅西洋船定為  
九等後因夷人屢請量減抽三分東洋船定為四  
等我

朝未禁海以前洋船詣粵照例丈抽但往日多載珍

奇今係日用雜物今昔殊異請於原額之外再減  
二分東洋船亦照例行至江浙閩廣俱經開海若  
不畫一恐啟外夷趨避之端應照粵省量減此等  
丈抽船隻裝載回國或因風水不順飄至他省查  
驗印票即便放行其四省印烙船隻往外國貿易  
者亦照此例從之

二十五年停止抽稅溢額議叙之例先是康熙四  
年罷抽稅溢額議叙之例至十四年題准各關欠

不及半分者降一級留任餘照前例全完者紀錄  
一次溢額每千兩者加一級至五千兩以上者以  
應陞缺先用十六年題准各關額稅二萬兩以下  
者仍照前議叙二萬兩以上者額稅全完紀錄一  
次溢額半分以上加一級一分以上加二級一分  
半以上加三級二分以上加四級三分以上以應  
陞缺先用數多者遞准加級十七年定關稅足額  
者不准議叙至是



上以各關差苛取溢額希圖議叙而採買銅觔價值不敷  
恐累商人令大學士等傳集舊任關差各員問明  
四季造冊送部果否有益據舊任關差各官並稱  
部定銅觔價值六分不敷採買其各差造冊四季  
報部不如改令差滿之日一并彙送奉

諭旨國家設關權稅必征輸無弊出入有經庶百物流通  
民生饒裕近來各關差官不恪遵定例任意征收託言  
辦銅價值浮多四季解冊需費將商人親填部冊改換

塗飾既已充肥私橐更圖溢額議叙重困商民無裨國  
計朕思商民皆我赤子何忍使之苦累今欲除害去弊  
必須易轍改絃所有見行例收稅溢額即陞加級紀錄  
應行停止其採辦銅觔定價既已不敷作何酌議增加  
其四季達部冊籍應俟差滿一次彙報嗣後務令各差  
潔已奉公實心釐剔以副朕體下恤商至意如或仍前  
濫征侵隱藐玩不悛作何加等治罪至銅價既議加給  
額稅應否量增俱著九卿詹事科道詳議具奏尋議闕

差各官希圖議叙託言銅價浮多不遵定例任意苛征令酌議加增銅價停其議叙即於各關部定則例原額外酌量勻派著為定額以為採買之費以康熙二十四年為始如有例外苛索征多報少將商人親填簿單捏造改易被叅察出從重治罪至見在關差各官雖有溢額俱不准議叙并傳其四季所報部科簿單總俟任滿彙報從之

又

救關差缺額處分仍依定例御史敦拜條奏關差缺額處  
分例輕以致拖欠日重應嚴定處分則例並賠補  
限期

上曰關差缺額處分自有定例若法令太嚴必致苦累商  
賈所奏無益不准行

救閩海抽稅仍依定例督理閩海稅務戶部郎中瑚什巴  
疏言閩省商賈貿易無丈船抽稅之例請照粵閩  
一例丈抽至貿易船隻原在某關印烙給照准出

海口者別關不得私留仍令各回本關庶人數軍  
器各有稽查而奸宄不敢影射得

旨凡收海稅官員因係創行設課希圖盈溢將出入商民  
船隻任意加征以致病商累民亦未可定著嚴加申飭  
務令恪遵定例從公征收無溢無苛以副朕軫恤商民  
至意所請不准行

二十六年議許墅關監督征收溢額之罪戶部題  
許墅關監督桑額任內除征收正額外溢銀二萬

一千二百九十六兩零得

旨設立關權原欲稽查奸宄照額征收桑額征收額課乃私封便民橋以致擾害商民著該衙門嚴加議處

二十八年嚴飭各處權關毋得稽留商民奉

諭旨朕舟行所至諮訪過關商民每不難於輸納額稅而以稽留關次不能速過為苦權關官員理宜遵奉屢頒諭旨恤商惠民豈可反貽之累自今應力除積弊凡商民抵關交納正稅即與放行毋得稽留苛勒以致苦累

違者定行從重處分

又議定江浙閩廣四省海關徵稅之例戶部奉

諭旨近聞江浙閩廣四省海關於大洋興販商船遵照則例征收稅課原未累民但將沿海地方採捕魚蝦及貿易小船概行征稅小民不便今應作何征收俾商民均益著九卿詹事科道會同確議以聞尋經九卿等遵

旨以兩議覆奏一議錢糧無多應交地方官征收一議交與地方官則無專管之員應仍差官征收至海中

船隻何者應免收稅惟候

聖裁得

旨採捕魚蝦船隻及民間日用之物併糊口貿易俱免其收稅嗣後海關著各差一員管理稅務

又減免閩海關稅額永著為例閩海關監督殷達禮奏閩海關稅額逐一確查分晰應免稅銀共六千四百九十四兩有奇著為例永遠遵行從之又免琉球國接貢船隻稅課琉球國中山王尚貞



疏言舊例外國進貢定數三船船中貨物免其收  
稅今琉球進貢止二船尚有接貢一船未蒙免稅  
請照例免收以足定數下部議覆准行

三十四年定山海關每年稅額銀二萬五千兩

三十五年令海洋商船往天津海口運米但收貨  
物正稅外免其雜費

三十七年減廣東海關額稅奉

諭旨廣東海關收稅人員搜檢商船貨物藥行征稅以致

商船稀少關稅缺額且海船亦有自外國來者如此瑣屑甚覺非體著減額稅銀三萬二百八十五兩著為令三十八年停罷各關正額外加增盈餘銀兩奉

諭旨向因軍需繁費關差官員欲於正額外以所得盈餘交納充用今思各官孰肯自捐私橐必仍行苛取商瘠民困職此之由著將加增銀兩一槩停罷

四十一年遣官偕喇嘛監督打箭爐貿易喇嘛達木巴色爾濟郎中舒圖員外鐵圖等往打箭爐地

方監督貿易

上諭以移文第已令彼速遣大喇嘛來監督貿易其稅銀

不取於彼就我國商人征之不可專以稅額為事

互見市糴

考

四十七年免暹羅國貢使所帶貨物征稅禮部題  
暹羅國貢使所帶貨物請聽其隨便貿易并免征  
稅以示柔遠之意從之

五十三年以臨清關稅務交巡撫征收奉

諭旨臨清關錢糧每至缺額皆由地方積棍串通作弊所致不必派遣監督著交該巡撫收稅

五十五年以鳳陽關稅務交巡撫征收戶部奏請更換鳳陽等關監督

上諭大學士等曰各關監督所欠錢糧甚多未派之先俱願前往及到任之後額稅必欠此皆多帶人役征收過刻之故昔南新關有一監督問巡撫王度昭錢糧如何不致缺額王度昭告以從寬征收斷不欠缺後果如其

所言鳳陽關額稅著交與該巡撫征收餘缺俟朕另派  
又嚴各關監督題請展限之禁戶部題奏定例各  
關監督一年限滿更替邇來以錢糧虧空為辭題  
請展限者甚多嗣後有似此者請照溺職例革職  
從之

五十七年

命浙江南新北新兩關稅務交杭州府捕盜同知管理從  
撫臣朱軾請也

又定免廈門關經過商船增稅之例閩浙總督覺羅滿保疏言各省往來臺灣船隻經臣題明必令到廈門盤驗護送但查從前自臺灣往各省貿易船隻俱從外洋直至停泊之處赴本處海關輸稅至於中途經過之所不便一貨兩征嗣後各省商船遵例必到廈門盤驗除收泊廈港貿易者照舊報稅如收泊江南浙江各省貿易者仍聽其彼處海關報稅其中途經過之廈門關稅免其增添下

所司議行之

五十八年

敕查江西湖廣糧船無得夾帶貨物致妨權政戶部議覆  
蕪湖關監督赫昌疏言蕪湖關缺少錢糧因江西  
湖廣糧船二千餘隻每年過關旗丁任意將貨物  
滿載船尾拴扎木筏不令查驗請令兩省糧道於  
本處糧船載米起運後親身先行到關查驗放行  
如有裝載貨物木筏盡行入官庶於糧船無悞而

關課亦不致多闕應如所請令總漕於湖廣江西  
二省漕船載米起運後令各該道至上流漢口吳  
城馬頭親身稽察仍嚴飭押運官弁每船照定例  
除土宜六十石外如有違例多載及拴扎木筏過  
關者將貨物入官該管道及押運官弁一併題叅  
治罪從之

六十年議准停征淮安鳳陽等關米船課稅一年  
又議准淮安關稅交江蘇巡撫管理戶部議覆署



理河道總督事陳鵬年疏言淮安關稅經河臣趙世顯於康熙五十八年題請歸併總河衙門令裏外河同知一員管理臣思河員職守緊要不可暫離勢難兼管權務請別差部員或歸併附近衙門帶管應如所請將淮安關稅交與江蘇巡撫管理從之

六十一年免暹羅國運米收稅奉

諭旨暹羅國人言其地米甚饒裕價值二三錢即可買稻

米一石朕諭以爾等米既甚多可分運米三十萬石至  
福建廣東寧波等處販賣此米係官運不必收稅

互見市糶

考

又

敕各省稅務悉交地方官監收總理事務王大臣奉

諭旨往年稅差官員公帑無虧而羨餘又足養贍家口兼

及親族近日則不然率多虧帑獲罪公私均屬無益

皇考洞鑒其故每將稅務交與地方官管理各省已居其

半嗣後稅務悉交地方官監收歲額之外所有羨餘該撫奏聞起解應賞給者再行賞給至雍正元年正月戶部等衙門議定許墅揚州龍江蕪湖湖口贛關太平橋粵海閩海等九關稅務應照淮安天津等關例交與各該撫令地方兼管從之

雍正元年以額外御史慶元管理淮關稅務時兼管稅務趙世顯征收錢糧多侵蝕隱瞞之項

上以淮安關課緊要著慶元查明即授慶元額外御史管

理稅務三年

又嚴飭各關差及崇文門稅務毋許任信胥役分外苛求奉

諭旨朕撫御寰區加惠黎庶惟恐民隱不能上達近聞權關者往往寄耳目於胥役不實驗客貨之多寡而只憑胥役之報單胥役於中未免高下其手任意勒索飽其欲者雖貨多稅重而朦蔽不報者有之或重從輕報者亦有之不遂其欲雖貨少稅輕而停滯關口至數日不

過是國家之額稅聽猾吏之侵漁以小民之膏脂飽奸  
胥之谿壑司其事者竟若罔聞知乎又聞放關或有一  
日止一次者江濤險急河路窄隘停舟候關於商亦甚  
不便嗣後司關權者務須秉公實心查驗過關船隻隨  
到隨查應報稅者納稅即放不得任胥役作弊勒索阻  
滯以副朕通商便民之意至於崇文門收稅及分派各  
處查稅之人亦有多方勒索分外苛求之弊京師為四  
方輻輳之地行李絡繹豈宜苛刻滋擾尤當不時稽察

杜絕弊端

二年以兼理關權

諭各省督撫實心辦理奉

諭旨從來關權之設或用欽差專轄或令督撫兼理無非因地制宜利商便民之至意也大抵關差之弊皆惟知目前小利恣意侵漁聽信家丁縱容胥吏開關分別遲早肆無厭之誅求報單任意輕重為納課之多寡飽谿壑者則任其漏稅代為朦朧不遂欲者則倒篋傾箱不

遺纖細致商賈畏懼裹足不前行旅徬徨越關迂道則困商實所以自困也故關差惟在嚴禁苛求使舟車絡繹貨物流通則稅自足額至於督撫皆封疆大吏當仰體朝廷歸併之心不得視為帶理漫不經心誤任屬員聽其剝削况欽差猶每年更換而督撫兼理則無限期若不實心奉法遴委得人責有攸歸其恪遵朕旨

臣等謹按此與元年所奉

諭旨並為各關奉差者以報滿有期視為傳舍歸併督撫

兼管望其實力奉行雖封疆繁重而遴委得人則  
弊端自絕嗣後或因時因地轉移委畀各從其宜  
仰見我

世宗憲皇帝加惠商民周知疾苦臚列諸弊端如在指掌  
損上益下之盛意為萬世準則云

又准移江西湖口權關於九江分設口岸於大姑  
塘從江西巡撫裴率度請也以湖口關稅盈餘

諭江西巡撫嚴飭胥吏毋致加稅累民江西巡撫裴率度



摺奏湖口關稅盈餘應悉解部奉

諭旨今歲盈餘是爾等清釐所致但數覺過多倘額外剝削商民則斷然不可關稅多少係於年歲之豐歉難可預定或遇不及之年不可勉強必求足數不然是又增加稅額矣當嚴飭胥吏毋致苦累商民

又免暹羅國運米壓船貨稅暹羅國王入貢稻種果樹等物并運米來廣貨賣廣東巡撫年希堯以

聞

上嘉其國王不憚險遠進獻稻種果樹等物最為恭順運

來米石令地方照粵省時價速行發賣其壓船隨

帶貨物概免征税

互見市  
糴考

又以各直省稅務申

諭巡撫并刊刷稅務詳單徧示商旅奉

旨朕念商賈貿易之人往來關津宜加恩恤故將關差歸

并巡撫兼管以巡撫為封疆大吏必能仰承德意加惠

商旅也但各關俱有遠處口岸所委看管之家人賢愚

不一難免額外苛求及勒取飯錢之弊稍不如意則執送有司有司礙巡撫之面徇情枉法則商民無所控訴矣嗣後將上稅課之貨物遵照則例逐項開明刊刷詳單分發各貨店徧行曉示使衆皆知悉其關前所有刊刻則例之木榜務令豎立街市人人共見不得藏匿屋內或用油紙掩蓋以便高下其手任意苛索立法如此自能剔除弊端但爾等受朕委任之重尤當仰體朕心遴選誠實可信之人以任稽查之責必期商民有益方為

稱職

三年禁邊關城門索取蒙古進貢車輛茶馬稅銀  
其借名蒙古匿稅者罪之理藩院奉

諭旨邊關城門祇令來往商人納稅其請安進貢之蒙古  
等並無收稅之例今聞將伊等餘帶馬匹及口糧車輛  
與買用之茶俱勒令停止私行收稅并索取零星物件又  
有奸商希圖匿稅專雇蒙古車輛偷載商貨著行文該  
管官員嚴行禁止

又更定委員管理宿遷關及由開稅務例工部議  
准河道總督齊蘇勒奏言淮徐道一官有經管徐  
邳宿遷一帶黃運兩河之責地方遼濶工程浩繁  
且駐劄清江與宿遷關相距二百餘里不惟難以  
稽察而遇河工緊急之時更不能分身兼顧恐於  
公事有悞請將宿遷關收稅事宜

敕令督撫擇就近賢員以司其事再揚州江防同知既管  
瓜州一帶江工又收由開稅課亦難兼顧應請一

例飭委別員俾同知得專力修防應如所請得

旨宿遷閩著交與年希堯兼管由閩稅課著該撫遴選就

巡地方賢員管理

又定川省船料報稅飭禁沿途地方官借端需索  
川陝總督岳鍾琪疏言川省運販米船向無船料  
客商或夾帶私鹽違禁之物無可稽查而沿途地  
方往往借端需索請照淮閩船料尺寸則例抽報  
料稅所輸無幾稽查甚便至米船出川地方官如

有勒索稽留者該督撫指名題叅從之

六年免暹羅國運米內地稅銀禮部議覆福建巡撫常賚疏言暹羅國王誠心向化遣該國夷商運載米石貨物直達廈門請聽其在廈發賣照例征稅委員監督嗣後暹羅運米商船來至福建廣東浙江者請照此一體遵行得

旨依議米穀不必上稅著為例

互見市糴考

又

欽定各關征稅則例戶部議浙江布政使高斌奏許墅關  
現行征收則例與部頒數目不符請

敕部議定刊刻木榜令衆商共曉遵依應如所請並令直  
省各關將各處現行徵收則例徹底清查據實奏  
聞刊刻木榜曉示奉

旨著各省兼理稅務之督撫並各關監督實力奉行毋得  
陽奉陰違虛應故事倘經接理之員查出定行交部從  
重議處



又定夔州府收稅派差監督一員戶部議覆四川  
巡撫憲德疏言夔州關稅向委夔州府知府監收  
請於己酉年為始照許墅淮關例派差監督一員  
征課按年遴員更換應如所請從之

諭崇文門查稅官員毋得稽留會試舉子借端苛索內務  
府總管常明奏報蘆溝橋遵

旨蓋造官房安歇會試舉子工程告竣得

旨此朕體卹應試舉子之意俾其有旅次居宿之安而無

盤查行李之擾並令崇文門每年查稅官員實心奉行嚴飭巡察人役等毋得借端稽留額外苛索

七年令各關據實填寫部頒號簿奉

諭旨各關開放船隻之處向例部頒號簿以便稽查茲聞各關另設私簿征收惟於報部之時始將號簿挨日填造其意以水路船隻往來多寡不齊若據實填簿則不能逐日有征收之數目恐干駁查是以設法勻派填造如此則簿內全非實在數目與商船過稅串票毫不相

符殊非政體凡事據實則可以無弊作偽則弊竇叢生  
今既係任意勾派填造則號簿亦為虛設矣嗣後各關  
於部頒號簿據實填寫如無船隻過稅之日亦即註明  
不得仍蹈前轍致滋弊端

又移湖北荊州徐關於田家洲更名田關從湖北  
巡撫馬會伯請也

又免暹羅載米失風船隻貨稅禮部議覆廣東總  
督孔毓珣疏言暹羅載米船隻因風飄泊廣東已

飭各屬加意撫恤其撈回壓艙貨物仍請准其輸  
稅發賣得

旨免其輸稅

又以核實落地稅銀申飭各省大小臣工奉

諭旨朕即位以來屢有臣工條奏各處地方官征收落地  
稅銀交公者甚少所有盈餘皆入私橐雍正三年又有  
人條奏廣西梧州一年收稅銀四五萬兩不等止解正  
項銀一萬一千八百兩潯州一年收稅銀二萬兩止解

正項銀二千六百兩應令該撫查核據實奏聞並令各省抽收稅銀之處俱據實奏報等語隨經九卿議令各省督撫遴委幹員監收一年之後視其盈餘若干奏聞候旨朕思孟子言治國之道首稱取於民有制所謂有制者即一定額征之數也若課稅之屬無顯然額征之數則官吏得以高下其手而閭閻無所遵循即如從前各處稅課經地方官征收有於解額之外多數倍者且多至數十倍者既無一定之章程則多寡可以任意其

弊不可勝言屬員既已貪取上司必至苛求官員既已營私胥吏必至橫索日積月累漸有增加之勢豈非生民之隱患乎朕是以允從條奏所請及九卿所議令各省督撫委員監收以定科則其征收不及舊額者亦令奏聞降旨裁減年來報出盈餘之處朕皆令留於本地或作各官養廉之需或為百姓公事之用使官員用度有賴自不妄取民財使地方公用有資即可寬恤民力無非以止民財物仍用之於民間不令飽貪官汙吏之

欲壑而已乃聞外省中多有奉行不善者以朕愛民除  
弊之善政而庸劣有司借歸公之名或肥身養家或爭  
多鬪勝以致肩挑背負之微物皆征收稅課而該督撫  
等又不悉心稽查民間苦於擾累自諭到通行之後倘  
仍有如此者必從重治罪決不寬貸

八年定征收落地稅銀搜求濫額議處之例戶部  
奉

諭旨向來各處落地稅銀大半為地方官吏侵漁入已是

以定例報出稅銀四百兩者准其加一級後因查報漸多吏部定議報出稅銀八百兩者准其加一級多者以此計算年來地方官員皆知守法奉公凡有稅課隨收隨報不敢侵隱其報出之數每倍於舊額祇恐將來不無冀偉功名之人希圖優叙以致恣意苛索擾累小民且落地稅銀非正項錢糧有一定之數者可比侵蝕隱匿者固當加以處分而爭多鬬勝者不但不當議叙亦當與以處分其如何定議並如何議叙加級處分之處



著吏部戶部悉心妥議具奏尋議嗣後各省落地稅及  
稅契銀兩如搜求需索以致盈餘之數倍於正額  
或將數十年以前置買產業苛索擾累者令該督  
撫題叅革職上司失察徇庇查出照例議處其於  
正額外實在盈餘者以八百兩為率准加一級多  
者不得過三級永著為例從之

十二年令直省督撫稽察各關權務奉

諭旨直省關稅監督於地方官原不相統轄一切呼應不

靈而大小口岸甚多監督一人勢難分身兼顧雖選委書役公同親信家人稽查收放而地方文武各員以為無與已事並不協力或轉挾私意則姦商之隱漏地棍之把持督撫或不關心監督動則掣肘不獨於稅務無補即於地方亦難免擾累嗣後凡有監督各關著該督撫兼管所屬口岸飭令該地方文武各官不時巡查如有縱容滋擾情弊聽該督撫叅處至監督徵收稅課及一切應行事宜仍照舊例遵行不必聽督撫節制如此

庶既有專司仍無歧視於稅課商民似均有裨益嗣據  
監督毛克明奏稱粵東海關地面遼濶事務繁多  
洋商胥吏以及地方勢豪引誘串通弊端百出監  
督一官難於稽查防範不若就近歸於督撫兼管  
則通省文武軍民均受統屬節制不敢欺公玩法  
再令京員掌管監督印信監收錢糧則稅務肅清  
而弊端可杜疏上照所請行

又以貴州永寧縣改隸四川裁除永寧縣稅四川

叙永廳與永寧縣同處一城從前廳隸四川縣隸貴州各設稅口征收鹽雜等課嗣經兩省會勘將永寧縣改隸蜀省所有田地丁糧已俱改照川省條例征收惟稅課一項仍係廳縣兼收

敕諭將縣稅裁除止留叙永廳稅一切俱照川省之例行十三年議定張家口居庸關已經收稅之貨無得於宣府重徵設居庸關稅課大使一員戶部議准兵科給事中尚德疏奏關稅事宜一宣化府為南

北通衢凡有貨物已經張家口居庸關上稅過府  
之時張家口監督復委家人書吏照數重收以致  
小民肩挑背負無不邀攔收稅民情甚為不便且  
家人書吏征多報少究非實裕國課嗣後南北商  
貨若已在張家口居庸關上稅者請勅部定例宣  
府不許重征刊刻木榜豎立各門如有違禁橫征  
者嚴加叅處一居庸關收稅之所離張家口三百  
餘里監督勢難躬親每差親信家人協同書役攜帶

印單收稅而家人識見卑鄙輒為關役利誘私用小票隱漏偷肥嗣後請委附近州縣不時查考但昌平延慶二州離關稍遠請設立稅課大使一員給以鈐記令收商稅銀兩按月轉解監督仍令霸昌道就近稽查照宣府之例民間零星日用之物免其抽稅如有指勒商民侵漁滋事者亦嚴加叅處均應如所請從之

是年

皇上即位之初奉

旨朕聞各省地方於關稅雜稅外更有落地稅之名凡  
糧鋤箕帚薪炭魚蝦蔬菜之屬其值無幾必查明上  
稅方許交易且販於東市既已納課貨於西市又復  
重征至於鄉村僻遠之地有司耳目所不及或差胥  
役征收或令牙行總繳其交官者甚微不過飽姦胥  
猾吏之私索而細民已重受其擾矣著通行內外各  
省凡市集落地稅其在府州縣城內人烟湊集貿易

衆多且官員易於稽查者照舊征收不許額外苛  
索亦不許重複征收若在鄉鎮村落則全行禁革不  
許貪官污吏假借名色巧取一文著該督撫將如何  
裁革禁約之處詳造細冊報部查核倘奉旨之後仍  
有不實心奉行暗藏弊竇者朕必將有司從重治罪  
該督撫並加嚴譴此旨可令各省刊刻頒布務令遠  
鄉僻壤之民共知之嗣以淮關監督年希堯於徐州  
所屬四縣之落地稅例應地方官征收者改為關



額征收私添稅口并市集買賣微物亦勒令上稅  
得

旨交該督撫嚴查究審并飭行查明該縣落地稅之應  
征者歸地方官征收應革除者仍即遵

旨革除

皇朝文獻通考卷二十六

欽定四庫全書

皇朝文獻通考卷二十七

征權考 二

征商 關市

乾隆元年革除龍江西新關衙規驗票等項銀兩  
戶部覆准兩江總督趙宏恩等奏稱龍江西新關  
務舊有衙規茶果照驗單票等項在正額盈餘加  
一火耗之外應令一概革除如織造衙門承辦各

項差務養廉不敷准在盈餘內支存一萬兩酌量  
動用每年將動用款項並餘存銀兩報解內務府  
查核從之

又定閩省征收漁船課稅例閩浙總督郝玉麟奏  
閩省漁課一項分隸侯官等三十六縣征收出諸  
各澳漁戶其原始於五代相沿至今新增漁稅一  
項分隸閩縣等十五縣南澳軍民一廳非獨征諸  
捕漁為業之船即出海小商船亦在其內定例樁

頭七尺以上折算五尺二寸歸關輸稅五尺以下  
歸縣輸稅又有船規一項分隸侯官等十三縣征  
收此合歸關歸縣之大小商漁船隻按照征收陋  
規也查漁課係應征之項相沿已久毋庸裁革但  
澳有漲荒船有歇業請照田地之例分別漲荒豁  
除其有澳之新開船之新造仍復按年辦理至漁  
稅一項歲有常額船無定數不以船之大小定稅  
而以船之多寡均徵胥吏得以高下其手請照田

房稅銀之例分別上中下三則起科不拘定額數  
儘收儘解其有已完漁課之船並小船渡船等概  
行豁免至於已經輸納稅課之船又取給照船規  
殊屬額外重徵應請革除如有不肖官吏私收入  
已者論如法從之

又以江南水災免各關米麥額稅戶部議准御史  
王文璿條奏江南被水各屬皆係濱江濱河之地  
轉運甚易應請特頒

諭旨勅部查明隣近災屬之關口將米麥等額稅以奉  
文之日起暫行寬免兩月扣算期滿照舊征收但  
江省水路乃南北通衢商販往來絡繹不絕誠恐  
米船過關免稅之後商人隨處售賣不至被災地  
方應令該督撫轉飭管理關務各員凡有米船過  
關即詢明該商如果前往被災各邑售賣者免其  
納稅給與印票責令到境之日呈送該地方官鈐  
蓋印信以便回空查銷如有免稅米船偷運別省

并未到被災地方先行糶賣者將寬免之稅加倍  
追出庶商販流通市價不致昂貴疏上得

旨依議速行

又定甘省稅課則例頒示通行甘肅布政使徐杞  
奏言各省應納稅課例應刊刻木榜大書設立關  
口使商賈一目了然經戶部議請通行各省臣遵  
即通飭各屬大書設立并納稅串根與造報底冊  
逐一查對內有比冊征收短少者亦有比冊浮多



者更有比坊刻通行則例浮減不一有無不同者  
且有府與府異縣與縣異一稅而數處各別者緣  
各屬並無部頒則例各憑照破爛舊本按物收稅  
伏查甘省稅課除牙帖等項外有商畜二稅內有  
過稅坐稅之分過稅係販往別地貨物應納過路  
之稅坐稅係置買別地貨物到店發賣即為落地  
稅銀稅名不一輕重各別必須逐條刊刻大張曉  
諭方免濫收脫漏今甘省既失部頒條例輸納自

無準則未便因其相沿已久苟且從俗仰懇

勅部查照逐條抄發刊示通行部議應如所請行文甘  
撫將該省應征各稅查照節年奏銷定數即行刊  
刻木榜大張曉諭倘各該州縣陽奉陰違仍有濫  
收脫漏之處即行指名題叅嚴加議處得

旨允行

二年以關稅既輕物價未減申

諭各省督撫奉

諭旨據原任江西巡撫俞兆岳奏報乾隆元年九江贛  
州兩關稅課盈餘銀兩較前任共減收九萬有餘此  
事交與該部及新任巡撫岳濬查核奏聞朕前因各  
省關稅於正額之外每多無名之費恣意科索苦累  
商民是以降旨釐剔弊端將應行減除者概令禁止  
全在督撫大臣等督率司權之員潔已奉公實力遵  
行以副朕輕徭薄賦加惠商民之至意今就江西一  
省言已少收銀十萬兩推之各省則約計百有餘萬

矣如果商民得沾實惠即更逾此數亦朕所樂聞有  
何吝惜但從來關榷稅務與百物價值原係相為表  
裏如果關稅減輕則物價亦必平賤若稅輕而價仍  
不減是各關所減課銀商民並未沾被恩澤徒飽吏  
胥之囊橐耳我

皇考臨御以來澄清吏治凡此等官侵吏蝕之習久已弊  
絕風清今督撫諸臣如不能稽查屬員被其朦混則  
庸懦無能有忝封疆之任若或已身少有染指則名

即有虧朕一經摘斥之後斷不復加錄用也可將此  
旨傳諭各省督撫令其各行稽察深自警省若錯會  
朕釐剔弊端藏富於民之意又欲多報贏餘以致商  
民受困識見鄙陋其罪更不可逭矣

又免天津臨清二關糧稅船料總理事務和碩莊  
親王允祿等議准四譯館少卿蔣炳疏奏雨澤愆  
期正需糧米若將關稅暫免俾商賈趨利輓輸源  
源接濟甚屬有益應如所奏將天津臨清等關裝

載米麥豆穀雜糧之車輛船隻到關驗明並無夾帶私貨即令放行暫免其抽稅并免其交納船料毋得藉端稍有留難阻滯俟得雨後行文征收從之

又以臺臣條奏各省稅務宣示內外臣工奉

諭旨御史舒赫德奏請將各省稅務歸併旗員管理不知國家設立關隘原以查察奸宄利益商民並非為收稅之員身家之計也若以旗員貧乏而差遣之是

導之使貪矣朕日以砥礪廉隅訓勉臣工尚恐其不能遵奉而可以謀利之見為之導乎且各省委辦稅務率多道府等官並無滿漢之別如滿洲有任道府而廉潔自愛者何嘗不可派委而必定以為例乎朕御極之初圖理琛即為此奏總理事務王大臣亦以為可行朕並未俞允後此陳奏者紛紛朕概不准行亦未交議今舒赫德又條奏及此可將朕旨宣示於外使咸知朕意

又免淮安沿河口岸等處經過米糧雜物納稅奉  
諭旨今冬挑濬淮揚運河大工齊舉所有員役人夫不  
下數十萬日用薪米食物所需甚多恐將來物價漸  
至增長查淮關則例除本地所收米麥雜糧不收稅  
課其外來客商販賣者按石征收舊例如此朕思目  
下興工之時若裁去一分稅銀自可平減一分物價  
於沿河居民及在工夫役均有裨益著管理淮安關  
稅內務府員外唐英將淮安大關并沿河口岸經過



之客販食米豆麥雜糧以及煤炭葦柴等物悉免稽  
查不必納稅俟明年工竣之後照舊征收又聞河南  
固始縣素稱產米之鄉每年客販運至清江浦地方  
卸賣其價頗賤今運口築堤固始米船不能直達清  
江浦而相近清江有老堤口地方可以卸賣着將此  
地米稅亦照淮關之例暫行寬免

又定淮安潁墅各關經費以杜吏役濫征之弊淮  
安關監督唐英條奏各項經費及書役飯食不敷

請動盈餘一案部議應行令江南總督慶復會同該監督熟籌妥議奉

諭旨朕思商民皆為赤子輕徭薄賦俾人人實沾惠澤乃朕愛養黎庶之本懷但恐官吏不能實力奉行仍多巧取以飽私橐則徒於國課有虧而於商民無益即如年來各省關稅較前額數大減矣其取之商民者仍似未減若關稅減輕則商貨價值亦應平減今京師貨物騰貴仍復如前可知商民未得實沾減賦

之益至江南淮安等關或因胥吏添設過多以致工  
食不足則當量行裁汰且查管關官員養廉之數亦  
覺太豐可通融分給如有不敷則動用盈餘以補之  
可寄信慶復諭知朕意經江南總督等會議查得潞  
暨關上年共支費用養廉八萬七千八百七十三兩  
有奇今遵

旨議裁衙役酌減工食養廉銀兩每歲經費預定額數  
約需銀七萬九千七百六十八兩有奇統由該關

報銷淮關遵

旨議裁人役工食銀四千九百七十六兩四錢有奇又書役飯食等項約需銀六萬五千五百二十八兩一分有奇如收數盈縮據實報銷疏上從之

三年暫免臨清天津二關米豆納稅及通州張家灣登陸處所落地稅銀奉

諭旨上年畿輔之地收成歉薄米價日漸昂貴今聞近省商賈米船陸續漸至所當格外加恩俾其踴躍從

事着將臨清天津二關米豆之船免其納稅至通州  
張灣等登陸處所舊有米豆雜糧落地稅銀亦着免  
征俟二麥收成之後米價平減再照舊例征收并嚴  
禁不肖官吏暗中需索等弊以副朕通商惠民至意  
嗣因二麥有收經督臣覆奏開徵復因沿河地方  
被水米價加昂海運既開商販雲集將內河前項  
米糧各稅一併暫停征收並江南浙江歙收之處  
俱免其收稅

又以江南米船過關免稅給照繳銷之法行知各處關差時江蘇歲旱歉收凡商販米船前往被災各邑給照免稅者到境鈐印回空驗銷難免守候稽延許關監督海保與巡撫許容議詢明運往災邑米船行知該邑印官到境申報至所給過關免稅照票不必鈐印聽其隨便回空繳銷並以面商辦理之處奏聞奉

旨覽海保所奏與許容商酌辦理之處甚是各處關差

凡有商販米船至被災之州縣者俱照此例行至於商船先報前往某州縣若此地販運者多米糧足用即不妨轉移隣邑總之歛收之地乏食之民皆吾赤子不容歧視也

四年定潞壘關口岸船柵裁撤事宜先是御史舒赫德叅奏潞關監督海保於離關百里及二百里之常熟無錫江陰等縣私立柵座濫設巡船密行江督蘇撫將該關私設各口相度情形報部據該

督那蘇圖奏稱潁墅關在長洲縣境最為衝衢所轄湖河海道支港紛繁易於透漏從前崇福等三橋望亭等七港十處口岸設役守巡報部有案歷任監督恐稽查難周添設蠡口港等一十三處船柵以佐三橋七港之不及後又添設板橋等二十九處通共五十二處口岸雍正八年前蘇撫尹繼善將續後增設之板橋等二十九處盡行裁撤另於王莊等十處立柵及顧二房廊下等五處設船



統計現在口岸三十八處今臣遵照部文就現在各口詳酌查有原報部之轉水柏瀆二港既於毛塘九里二處添設柵巡則二港可以毋庸複設又南北角各減去巡船一隻其各處口岸應請暫為存留仍不作報部經制如有應行納稅之船俱令直赴大關報稅不許各口擅立稅房私自征收亦不許混指透漏濫行究罰至於本地土貨非捆載貿易遠方者原不征課其附近鎮集船載米麥不

及十石者免其收稅農民交租辦糧質當米麥皆  
不論石數放行章程久定仍應遵照辦理經部議  
駁飭另議得

旨照該督所請行

又准江蘇撫臣所奏以兩淮鹽政管理瓜州由關  
稅務揚州鈔關及瓜州由關稅務自歸併巡撫例  
於道府內遴員代管是年以揚州知府高士鑰查  
災辦賑未能帶管榷務撫臣奏鹽政近在同城稽

查便易可否照織造管關之例就近令其帶管於  
權務實有裨益從之

又

勅蕪湖鳳陽關稅務專差管理戶部議原任安徽巡撫  
孫國璽奏蕪湖鳳陽兩關稅務請專差監督管理  
應如所請從之

五年以塽板閘稅務歸併臨清關管理先是山東  
巡撫岳濬奏稱臨清州有二關一為戶部關係巡

撫衙門管理收稅解交戶部一為工部塽板閘關  
報納短載紙價稅銀係管河道管理收稅由河道  
總督奏銷解交工部各船既向大關報納貨稅船  
料似毋庸一地兩關經河道總督議奏請將工部  
一關裁去其應征銀兩移歸臨清大關征收從之  
又嚴禁捏名討關積弊戶部議覆御史陸尹耀奏  
稱會典內開過關船隻如有指稱內外官員及旗  
下商人夾帶私貨者該關報部叅處是權關定例

遵行已久近復有執持科道名帖赴關免稅者查  
京員科道等官供職京師自無經營貿易之理即  
或子弟偶有在外經商者豈容捏寫父兄名帖討  
關希圖透漏恐在外奸商或捏名影射希免稅料  
亦未可定應通行管關各督撫監督嗣後在京及  
在外官員眷口船隻過關除無貨物照常驗放胥  
吏人等毋得任意需索外如有假捏京員科道名  
帖或有京員子弟執持父兄名帖討關夾帶貨物

希圖免稅者遵照定例查叅如明知瞻徇一併議處從之

六年清查外省關榷私增口岸奉

諭旨外省關榷皆久經該督撫就近稽查除現設口岸報部有案者照舊設立外其有私行增添之口岸逐一詳查題報應留者留應革者革此番清查之後司權之員若再有違例苛索者胥役嚴處官吏嚴叅該督撫不行查察經朕訪聞必於該督撫是問至許墅

北新二處係江浙大關尤為緊要交與楊超曾德沛  
照此稽查辦理

又免官辦米穀過關稅銀戶部議覆署理兩江總  
督楊超曾奏言設關之意不專在於取盈蓋以準  
百物之權衡而平其市價故歷來但有征商之令  
而不兼及於官物況米穀一項係民間食用所必  
需發帑採買原為接濟民食起見與商賈之射利  
逐末者不同今既征其船料又責其完納稅銀取

之司庫以輸關庫此絀彼盈國課毫無增益應如該督所請將各屬委員採買賑濟及糶三補倉米穀經過各關稅口仍照臣部題准之例止納船料可也疏上如議行

又議定武昌廠關口岸稅額並除宗關收稅耗羨戶部議覆湖廣總督那蘇圖奏武昌廠關正額盈餘之外所收口岸銀兩並正額盈餘項下征收加一耗銀先於雍正十年據撫臣咨報征收餘銀二



千九百餘兩今據奏稱每年征收共計銀一萬餘兩除例應支銷外每年約可餘銀七八千兩是較之歷年報收銀數盈餘幾及加倍即將此項為地方辦理利濟軍民之事如標營兵丁應建營義倉廩武昌漢陽應設義渡船隻管關之員既徹底報出亦應酌給公費至各關口岸銀兩因非正項既不收耗則宗關同一口岸自不應獨收耗羨應據督臣所奏准其免收從之

又飭各關盈餘增減據實造報考核具題奉

諭旨各省關稅定有正額而儘收儘解日有盈餘此不過杜司榷者侵蝕之弊並無有累於商民也但各省年歲之豐歉不同貨物之多寡亦異其盈餘原不能每年畫一近見各關報滿之時如盈餘浮於上年則部中不復致議如減於上年之數則部中即行駁查司榷者惟恐部駁必致逐歲加增年復一年將何所底止苦累商民事有必然之勢朕思關稅盈縮相去

本不致懸殊若乙年所報盈餘之數稍不及甲年原  
可不必駁查若過於短少亦必有情由惟應令督撫  
確查則地方實在情形自難逃於公論總之查核過  
嚴則額數日增其害在於衆庶查核稍寬則司權侵  
蝕其損在於國帑此中輕重固有權衡著大學士會  
同該部詳議具奏經部臣議定嗣後各關盈餘銀兩  
如與上年數目相倣者戶部即行考核具題如本  
年所報盈餘與上年數目大相懸殊令各該督撫

就地方實在情形詳細確查如無侵隱等弊據實  
聲明覆奏倘該督撫查奏不實扶同徇隱別經發  
覺將該督撫等一併交部議處著為定例

七年免乾隆三四兩年渝關缺額追賠銀兩四川  
巡撫碩色奏重慶渝關木稅與別項雜稅不同抵  
渝木料皆伐自深山窮谷年豐水漲則木筏順流  
而下一歲之中可以發數年之木若遇歲旱水涸  
不能漂出則已伐之木常積於深溝淺溪未能到

渝是年歲之旱澇不齊木料之多寡難定則稅銀盈縮亦理勢之必然也渝關木稅自乾隆二年三年皆不敷原額奉部行追而乾隆五年時值米賤水漲木多稅盈扣此補彼更有盈餘奏請免其賠補從之

又免直省各關米豆稅奉

諭旨朕御極以來直省關稅屢次加恩減免每遇地方歉收天津臨清許墅蕪湖等關口商販米船概給票

放行免其上課皆以為民食計也但係特恩間一舉  
行未能普遍夫以養民之物而權之稅轉以病民非  
朕已饑已溺之懷也今特降諭旨將直省各關口所  
有經過米豆應輸額稅悉行寬免至各關口征收則  
例不一有征商稅者有征船料者有商稅船料並征  
者今既蠲免米稅其船料一項若不分晰明確著為  
規條恐致混淆滋弊應如何辦理之處著交該部詳  
查妥議具奏經部議詳查各關米豆雜糧等稅有按

樑頭丈尺納料者有收納船戶空船料銀及無論  
有載無載按年抽單納課者又有計石征稅不收  
納船料者各關則例有殊故征收未能一致應令  
各關監督查明定議報部旋據御史李清芳沈廷  
芳並奏部議船料事件俱發九卿議奏未上得

旨朕愛養黎元特沛殊恩將關樵米豆等稅悉行蠲免  
以為充裕民食之計但船料一項議論不一朕思向  
日征收船料者應照例征收向不征船料者豈可因

免米豆之稅而轉加征料該部即速行文各關知之

又奏准麥石稅課一體免徵署福州將軍兼管閩海關事策楞奏豆稅既經免征部文並未指明麥石字樣應否一體寬免奉

諭旨自應一體免征下所司知之

又禁革爐地裡塘等處私收畜稅打箭爐地方公出雅納二卡向有達賴喇嘛使人收稅并於裡塘等處收取鞍子錢每年約得稅銀不過六七百兩



雍正三年欽奉

諭旨每年賞給達賴喇嘛茶葉五十觔班禪額爾德尼茶葉二千五百觔并運茶腳費銀二百兩今將收取鞍子錢停止隨經達賴喇嘛將在裡在爐收稅之堪布等一併撤回嗣於雍正十三年達賴喇嘛自泰寧回藏後有留住惠遠廟之徒弟帕朋喀庫圖克圖羅卜藏格隆復安人於公出雅納二卡收取番民所賣騾馬牛羊稅銀四川巡撫碩色請

勅達賴喇嘛將私收畜稅之處永行禁革并在爐之藍占巴等一併撤回部議應如所奏得

旨允行

八年免淮關監督私免稅銀賠項淮關監督伊拉齊私自免征酒麴絹粉等稅銀部議應令賠補

特旨免之

又免征山東臨清關船料奉

諭旨山東臨清關向征銅補商補相沿已久報部則統

名之為船料前撫臣岳濬改為計石上稅而將銅補  
商補歸入石頭征解是名革而實存也今朕既降旨  
蠲免各省米糧之稅此項亦應一體邀恩豁免著該  
部即行文山東巡撫知之

又定暹羅國運米船隻酌免船貨稅銀有差先是  
乾隆七年暹羅商人運米至閩曾奉

特旨免征船貨稅銀至是歲仍復帶來來閩貿易

上念外洋運米源源而來其加恩之處自當著為定例

自乾隆八年為始凡遇外洋運米閩粵等省貿易帶米一萬石以上者免其船貨稅銀十分之五帶米五千石以上者免其船貨稅銀十分之三

九年定湖南寶慶府口岸收稅則例湖南巡撫蔣溥奏言寶慶府征收商稅向例按照貴賤價值酌中定數每兩三分之外不得多取絲毫一切零星貨物俱不許濫行抽取刊刻簡明木榜豎立曉諭其書役票錢向係稅銀一兩取銀一錢今酌減五

分不及一兩者不許苛索數浮一兩者亦不得過  
五分之多此外陋規一概嚴禁部覆准行

又飭各省奏報關課核實辦理奉

諭旨江南浙閩陞關乾隆六年十一月至七年十一月稅  
銀缺少一案經戶部行查巡撫覆奏稱係按月計算  
未經減少並無絲毫欺隱等語朕之裁減各關稅課  
並免米麥稅銀無非惠念商民之至意從前有旨盈  
餘減少戶部不必過於苛察惟令督撫就近查奏乃

自有此旨之後各處所報盈餘無不減少者而督撫之查奏亦不過虛應故事並無實力查出畧有異同者故自減免稅課以來米豆價仍然昂貴而於商民未見有益於稅課日見有虧用頒此旨通行訓飭朕既寬免稅課數百萬兩之多豈較量此些小盈餘之數各督撫及司稅官員毋錯會朕意以報增盈餘為念嗣後務須核實辦理無欺無隱不得視為具文

十年復開馬白稅口大學士伯鄂爾泰等議覆雲

南總督張允隨奏稱馬白稅口前因該國都竜廠被賊佔踞商旅裹足稅課無出是以題請封閉今廠民漸次復業應於明春撤回臨廣官兵之日照舊開關收稅儘收儘解據實填報至往來商旅責令該同知嚴加盤詰照例填給腰牌親身驗放不容奸匪混行出入應如所請得

旨依議行

又禁止宿遷關通船一載徵稅之例宿遷關舊有

通船一載之例如船實能受載百擔而所裝之貨乃在七十擔以下者仍照現徵之數按擔征收若有數滿七十擔者遂援通船一載之例令輸百錢糧其船隻之受載數百擔以至千餘擔者所裝貨物雖有多寡之殊而稅銀俱按此例征收至船頭船梢及平坂上跨俱為剔除不入簽量見數之內即有貯貨於此者亦不征其稅至是監督倭赫奏稱近有狡黠船戶每計貨船已滿七分即將貨



物分貯頭梢上跨以避一載之例而奸猾吏胥亦  
伺船貨之在七分上下者即高下其手以逞其隱  
漏勒索之技應如所請將散裝貨物不拘頭梢艙  
跨悉照成包成捆貨物一例簽查見數按擔征收  
將通船一載之例即行禁止從之

又豁免福建浦城關稅缺額銀兩奉

諭旨朕聞福建浦城關稅從前題定額征銀二千七百  
餘兩後於乾隆三年更定稅則委員監收一年以為

定額缺少銀五百四兩零嗣後連年短征蓋因該關  
長脚難於雇覓以致商貨稀少經征各員無力墊補  
遂成懸欠著將此項稅銀加恩豁除令其儘收儘解  
其乾隆三年以後節年缺額銀兩一併加恩免其賠  
解該部即遵諭行

十一年以米糧免稅價值仍昂

勅督撫示諭商賈平價江蘇布政司安寧奏言自免米  
豆稅銀以來弊竇叢生國課日少而米價之貴較

甚於前應請仍照舊征收

上念衆商乃無知愚人當先加以化導

勅各該督撫愷切訓諭俾各商感發天良悉除私弊督撫等仍設法查察妥協辦理庶幾足食便民閭閻均受其福

又免暹羅國商人船貨稅銀十分之二福州將軍新柱奏報本年七月內有暹羅國商人先後載米入口皆不足五千石之數並各帶蘇木鉛錫等貨

所有船貨稅銀未便援例寬免奉

旨該番等航海運米遠來慕義可嘉雖不足五千之數  
着加恩免其船貨稅銀十分之二以示優卹

十二年又改溪雅稅館於懸鐘地方並定舫仔頭  
船之禁先是福州將軍新柱奏請將溪雅稅館移  
至懸鐘經戶部行文撫臣周學健議稱溪雅地方  
遠距懸鐘三十里稅館設在溪雅船隻俱泊懸鐘  
在關則有鞭長莫及之虞在商則有乘機偷漏奔

走守候之弊部覆應如所請將溪雅稅館准其改  
設懸鐘又該將軍奏稱廈門等處有奸民置造船  
仔頭船雙蓬雙艙傍用四槳非商非漁專為包攬  
偷漏貨物請行飭禁經戶部行知該撫議覆請嗣  
後貼仔頭船式樣永行禁止所有現在之船毋許  
加用四槳多添挖水并十船編甲互結部議應如  
所請從之

勅內地人民往暹羅造船未載回米糧者倍罰船稅大

學士伯張廷玉等議覆福建巡撫陳大受奏閩省  
赴暹羅買米造船運回請給印票進口之日繳銷  
仍另給牌照歸澳安插蓋往暹羅造船本為買米  
而設如或該商並無米石載回只造船而歸者應  
令倍罰船稅示警得

旨允行

又免失風洋船官買銅舳稅課福州將軍新柱等  
奏商人陳天元船隻遭風銅舳全數交官照部定

價值收買仰懇免其銅稅從之

又以戶工二部奏報蕪湖關稅贏縮足數抵補免其駁查蕪湖關報部戶關盈餘較去年有餘毋庸置議工關盈餘較去年不足行令查覈奉

諭旨此案戶工二部所報足數抵補如將有餘者毋庸置議不足者再加行查於考核功過之意未合即使行查亦徒多往返登答工部再行查核之處不必行嗣後着該部照此辦理如一人而兼兩關其比較上

年盈餘之處俱有不足再令該督撫據實查核

十三年定廣東太平關收稅則例廣東巡撫岳濬  
疏稱太平關則例內未經開載之九十五條查照  
粵贛兩關稅則斟酌征收統按其中因與海關同  
屬初次抽稅及貨物貴重應照海關定例者則有  
珍珠玉器錦繡布楠木因先由粵海征稅次及內  
地分販應照贛關定例者則有氈氍琥珀蜜蠟瑪  
瑙多囉啤噠因粵贛兩關未載按照貴賤科稅者



則有布帳黃楊器黃楊木因原稅本屬平允即用  
着為正條者則有毛布水晶玻羅松線布刀石紅  
木因貨物初經收稅者則有姑紙花生甘草梅海  
石茶子桐子因各處出產價值不同適中損益者  
則有棉器布器油菜子因稅則籠統復加分別者  
則有哆囉器緞器氈器兒帽祖帽因物同名異即  
倣本例者則有氈底桌氈紫香粉麻包泥碗其  
洽光各條內因與太平橋正例開載相符應令一

體遵收者則有廢銅香葷洋青石青石綠八角金  
針菜紫檀紫榆木骨角器皮器鐵器布棉器各色  
糖菓綢綾器絲緞器哆囉器嗶嘰器錦絲線帶布  
帳簾苙鹽攬良薑柯子楓子草仁石蓮子石決明  
因下水已經輸稅上水應予輕減者則有紗羅包  
頭帽緯毛布氈片姑絨氈氈又木稅各條內因原  
稅本屬適宜即擬著為正條者則有土杉枋杉板  
松板紅木大杉木樟木枋板床板門枋因料大稅

輕量子加增者則有松木因料同稅重較正酌減  
者則有長薄板松筒杉木因論剪恐滋夾帶改作  
論根者則有遇仙橋之小杉木至遇仙橋滄光廠  
款目與太平橋相同者均應畫一抽收共計擬定  
貨稅七十三條木稅二十二條俱屬因地制宜斟  
酌允當反覆確核委無偏重偏輕一併刊載例內  
並豎榜三關廠曉示商民俾有遵循而稅則益歸  
盡善部議應如所奏從之

臣等謹按太平關征稅比照粵贛兩關因時因地以定稅額重輕如珍珠每觔纔收課銀二錢玉已成器者纔收課銀四分未成器者每觔收銀一分七釐有奇即使珠玉價值極微亦數十百分而取一矣其餘哆囉哩噠蜜蠟琥珀俱每百觔纔收稅銀一二兩香楠及黃楊俱每百觔收稅銀自一分至五分而止蓋通工惠商儉於取民超軼前代非可數計特以我

國家休養生息百有餘年幅員廣濶亘古無比凡舟車商賈所達西北及於天山外裔東南及於閩粵重洋積少以成多未始不足以資國用若分析計之則至微至薄矣夫征商之令見於周官孟子所述惡商賈之罔利故從而征之其詳不可得聞大約周人田賦以什一為制至於重本以抑末則征權之數諒必加於計畝秦漢以後稅額遞增征權之輕未有如我

聖朝者茲所臚列貨稅共九十五條按名定數未可以羅縷備書附識於此以見薄征之大概焉

又以廣西梧州等府稅務歸該管道員查核戶部議覆廣西巡撫鄂昌奏粵西梧州二府關稅及桂平南慶等府富川賀縣懷集等縣各雜稅銀兩皆為湊充兵餉及支給通省大小各官養廉之用向係該管府縣自行征收分別正額盈餘按季造冊解司並無專事稽查抽收之員則疎漏自不能免

查粵西蒼梧左江右江三道俱有統轄地方之責  
且其該管之府州縣例應按季巡歷一切稽查甚  
屬便易應請將各處稅務分隸各道就近稽查查  
桂林平樂蒼梧三府并富川賀縣懷集三縣俱係  
蒼梧道所轄其稅務即隸蒼梧道稽查南寧府係  
左江道所轄其稅務即隸左江道稽查潯州慶遠  
二府係右江道所轄其稅務即隸右江道稽查飭  
令各府縣將逐日抽收貨稅銀兩數目按月造報

該轄道查核并於按季巡歷之時親赴收稅之所  
飭取存廠抽收底簿與月報冊逐一核對應如所  
請從之

又以米豆免稅市價未平仍依原額征收戶部議  
覆江蘇浙粵閩監督圖拉條奏直省各關米豆稅  
銀歷來按額征收乾隆七年

皇上特恩寬商稅以平糧價乃自豁免以來奸商大賈  
惟知罔利不顧民艱近年各省米豆價並未少減



甚且有比舊加昂者徒使奸商飽橐市僧居奇窮  
黎究未得沾實惠誠屬無益況現當軍需浩繁之  
際亦宜酌量籌辦應如圖拉所奏將直省各關米  
豆稅銀仍復舊額奉

諭旨依議朕降旨蠲免各關米豆稅銀本以食為民天  
關稅優免則市價可減是以不惜千萬正課為小民  
謀饔飧寬裕計當時內外臣工屢有以但利商賈無  
益民生為言者概未允准朕意欲試行數年果否於

民食有裨再行酌量乃數年來稅免而米豆之價不  
惟不減而昂貴時或有加明係奸商不知免稅之恩  
專利自封轉以有限之帑項肥三倍之囊橐無裨閭  
閻久宜仍復原額且地方偶有偏災即將該處關口  
應征米豆稅額加恩寬免則估舶聞風雲集市價自  
平駟僮不得居奇窮黎均霑實惠轉得操權自上朕  
意不專為軍需起見也如既復之後奸商藉端長價  
弋利妨民該地方官即應嚴行查察究處至淮關因

寬免米稅後倭赫奏准加征船料今既征米稅仍循舊例行

臣等謹按米豆納稅向例征收

皇上念食為民天特降

溫綸免其征課以所去之額稅減糧價於市中則貧民日糴斗升計數加贏不啻分太倉之粟粒乃米稅既免而糧價日昂則減稅之效不著於常年當收於歉歲所以

俯允廷臣之請仍依舊例俾偏災郡邑可以鼓勵轉輸  
蓋出疆興販者本非南畝之民用其心計坐列市  
門既仰虧稅額於征商復力爭細民之價值其載  
米似知本務之重而罔利實為逐末之尤從古征  
斂之法即緣此輩而起我

國家正供賦額歲有蠲除而利權羸縮則仍操之自  
上因事轉移留權政之有餘補征斂之不足亦具  
見平施稱物之妙用焉

又以東省歉收特開海運接濟免收米稅山東巡撫準奏奏本年五月內經大學士高斌等以東省之登萊青三府地處東隅別無河道連年歉薄不但民間絕無蓋藏即倉儲亦因賑濟鮮有積貯請將奉天米石聽商民糴買由海運往山東售賣流通商販權宜補救誠為目下萬全急務欽奉諭旨允行今赴奉天販運各商陸續抵東請將此項米石行令免征稅銀飭地方官遵照辦理從之

十四年

勅直省各關稅額視雍正十三年分數為準戶部奏各  
關征收盈餘銀兩比較上屆短少至一分以上者  
各按數定以處分奉

諭旨此摺所見雖是但盈餘究在正額之外然非額外  
別征餘盈緣照額征收儘收儘解其溢於成額者即  
謂之盈餘是名雖盈餘寔課帑也亦即正供也當康  
熙年間關差各有專員恣意侵蝕不但無盈餘并不

數正額然至任滿之時未嘗不量其所入派工派差  
無得飽其私橐者而當時風氣俱視缺額為分所當  
然是以有雍正年間一番清理凡官侵吏蝕僕使中  
飽舉燭照而數計焉於是各關之以盈餘報者相屬  
而缺額者從未之聞矣可見歲額本數盈餘本有向  
之有缺無盈其弊自在漏卮耳自朕御極而中外人  
心舉知政尚寬大希圖欺隱時則盈餘歲減一歲又  
將漸開虧損正額之端用是曾降諭旨所有較前減

少之員交部嚴行察議令其少知法紀而朕意又恐  
查核過嚴則各關自顧考成必求溢美或致借端橫  
索因令數目相倣者該部即行核題迄今年復一年  
較前有減無增部臣請比較上屆短少至一分以上  
者各按數定以處分此雖為慎司國計起見然所稱  
與上屆比較不無流弊有如甲盈一萬則下屆之乙  
必思盈及萬有五干再下屆之內又將增加二萬至  
丁而三萬似此相競不已又將無所底止必至病商



歛怨非理財之正道也夫盈餘無額而不妨權為之  
額朕意當以雍正十三年征收盈餘數目為定其時  
正諸弊肅清之時而亦豐約適中之會也自雍正十  
三年而上下二三十年之中歲時之殷歛相若也賈  
舶之往來相若也民風之奢儉相若也則司權之征  
收又何至大相懸殊哉嗣後正額有缺者仍照定例  
處分其各關盈餘成數視雍正十三年短少者該部  
按所定分數議處永著為例

十五年定各關征收稅課成數扣足一年彙報戶部奏各關征收稅課有一年期滿者有未及年滿離任者亦有管理一年餘數月者是以奏報盈餘向係按照管關月日各清各任惟是各關稅課統年征收則貨物之出產皆齊商賈之往來畢集較之上年銀數自應相倣如係征收數月則貨物有衰旺之分商賈有多寡之異管關官員或數月內正值貨物豐盛或數月內適值貨物儉少若概照

周年足月之數勾算比較未免碍難查辦請嗣後各關管理稅務日期凡接任征收無論兩任三任俱令扣足一年為滿其管關一年餘數月者將一年盈餘奏報其奇零月數歸於下屆統俟扣足一年再行彙奏以昭畫一得

旨允行

又定古北口征收斗稅額銀戶部覆准直隸提督布蘭泰奏古北口斗稅贏縮原出於商販之多寡

乾隆十二年二月內歸營試收適遇口外豐收口  
內糧價較貴糧車進口雲集按例征收據實儘報  
是以收稅較增至乾隆十三年而口內地方糧價  
平減商販不前市集鬻糧無幾即斗稅亦無從征  
取是以收稅較少應准仍照原定斗稅銀二千兩  
之數作為正額如遇糧價昂貴販運者多征收盈  
餘據實儘數具報從之

十六年免浙省各關口米稅奉

諭旨浙東府屬兩澤愆期該撫預籌民食請弛海禁著  
照所請江閩二省商販赴浙屬之溫台寧處四府者  
准其暫開海禁仍令該撫飭屬給予印票沿途實力  
稽查嚴禁奸商等借端偷買透漏其浙省各關口並  
着加恩免征米稅以示招徠務俾商販流通米糧充  
裕該部遵諭速行

十七年以鎮雄州購運川鹽脚價彌補畢節稅課  
雲南巡撫愛必達奏言鎮雄新闢夷疆本無額稅

因畢節稅羨不敷議撥代征自雍正七年設立州城古芒部却左母亨牛街五處稅口兩省官員互相稽查迨後歸鎮雄州征收不能敷額臣查鎮雄州銅運馬匹因無回頭貨物脚戶等退縮不前現在議令承運官每歲購辦川鹽一百萬觔令馱銅之馬運回鎮雄州行銷每年擬酌收稅銀以補畢節稅羨之不敷於鹽價尚未昂貴而畢節稅課有看鎮雄商民無擾疏上

勅部議覆准行

十八年

勅各關奏報盈餘數目經部臣覆核無庸復交督撫查  
奏奉

諭旨各省奏報關稅盈餘數目較上屆短少部議俱交  
督撫查明情由該督撫不過據監督及管關委員所  
報取結聲明具覆從未有察出侵蝕情節據實查叅  
者章奏往返竟成故套朕思關稅時贏時絀勢所不

免若該監督等無故短少或任意侵肥該督撫自應隨時查察奏聞治罪如其果無情弊何必重複聲明徒滋案牘嗣後各省奏報關稅盈餘數目該部覆核時無庸復交督撫查奏

十九年免高堰堤工運石應造船料奉

諭旨高堰堤工需用石料辦運船隻甚多俱官為雇覓已接給水脚銀兩其例征船料自應照數完納但此番工程緊要更番迭運無悞工程加以石貨粗重挽



載維艱所有從前運石過關船隻應征料稅着加恩免其追繳

二十二年更定浙江海關洋船稅例戶部覆准閩浙總督喀爾吉善兩廣總督楊應琚奏稱設關分權原以裕課通商而因地制宜亦須權衡公當如外洋紅毛等國番船向俱收泊廣東少至浙江是以浙海關稅則畧而不詳今自乾隆二十年以來外洋番船收泊定海舍粵就浙歲歲來寧若不將比較則例更定

章程必至私扣暗加不特課額有虧亦與番商無補  
臣等悉心會商將粵海關征收外洋船隻入口出口  
貨物現行徵稅則例及比例規例併外洋船出口貨  
物估價科征各冊逐一查核除比例一冊緣天下之  
物類繁多稅則未能備載以此例彼比照征收原無  
軒輊其規例一項原係從前陋例嗣經查出歸公征  
收報解以上二項浙海關循照征收均毋庸另議增  
減惟正稅一項未便仍照粵海關科則一例征收蓋

向由浙江赴粵販買之貨今就浙置買稅餉脚費  
俱各輕減而外洋進口之貨分發蘇杭亦屬便易  
該番商既比在粵貿易獲利加多則浙海關之稅  
則自應酌擬加征其中有貨物產自粵東原無規  
避韶贛等關稅課者悉仍舊則概不議加正稅之  
外仍照加一征耗其粵海關估價一項係將該商  
出口貨物估計價值按貨本一兩征收銀四分九  
釐名為分頭今應遵照辦理但如湖絲磁器茶葉

等各種貨物現就浙江時值多與粵海關原例不符似應按照時值增估更定其中有時價相符者仍循其舊至船隻樑頭之丈尺及貨物進口出口之担頭悉照粵海關則例征收奉

諭旨依議此摺內所稱若不更定章程必致私扣暗加課額有虧與商無補等語尚未深悉更定稅額本意向來洋船俱由廣東收口經粵海關稽察征税其浙省之寧波不過偶然一至近來奸牙勾串漁利洋船

至寧波者甚多將來番舶雲集留住日久將又成一  
粵省之澳門矣於海疆重地民風土俗均有關係是  
以更定章程視粵稍重則洋商無所利而不來以示  
限制意並不在增稅也將此明白曉諭該督撫知之  
臣等謹按舊例海舶貿易外洋者給之照以稽察  
出入其出洋歸港皆憑照為信因按其照稅之有  
藏匿奸匪私帶違禁之物者論如法良以外洋紅  
毛諸國番船向皆收泊粵東

國家張官置吏分駐營伍以資彈壓凡定例所查禁者嚴明約束垂諸令甲是以海口肅清民不滋擾至於浙省寧波向非洋船聚泊之地邇年奸牙市舶狃於稅額之輕微自乾隆二十年及二十一年外洋夷船歲至定海轉運寧波於是督撫大吏據浙關科則比較粵海課額更定征收我

皇上聖謨深遠念海疆重地多一利端即增一弊數洋船歲至寧波徑途日熟勢將與粵省之澳門無異

而商舶頻仍則有奸牙之勾串吏胥之需索及其  
易貨歸棹則有絲粟之出洋鐵器之渡海日久弊  
生難以盡杜津會既成夷商叢雜之區必須重為  
經理夫昌國寧海松門澈浦皆浙省濱海之藩籬  
也推而至於金山乍浦海門崇明又南省濱海之  
門戶也風濤出沒持貨賄以懋遷既可驚趨寧波  
亦可轉移他郡利之所在瑕釁易滋

聖天子所以經畫於未然而杜其端於始事者職此之

由蓋自章程更定以來外洋市舶知違例紆道之  
無所利不復收泊寧波內無禁令之煩而夷艘自  
遠無事巡查之密而海口敦寧哉

皇上潛移密運之權誠有握要於幾先者矣

又免湖北撥運豫省米石回空船料奉

諭旨湖北撥運豫省米石抵豫交卸後原船回過各關  
例應輸納船料但各船戶回棹時如已攬載客貨其  
船料自當征收若僅原船回空船戶未免拮据着加



恩免其征收船料以示優卹嗣是二十三年復奉

特旨以川米原船回空時如查無攬載者一體加恩免

其征收船料

二十四年定葉爾羌喀什噶爾二處貿易抽稅例  
回部商稅舊制凡本地回民往外貿易帶回物件  
者抽稅十分之一外處回民販來物件抽稅二十  
分之一於乾隆二十四年經定邊將軍兆惠奏聞  
仍照舊例辦理是年又據叅贊大臣舒赫德奏稱

葉爾羌喀什噶爾二處牲畜價貴請減收商稅分數奉

旨允准嗣是本地貿易帶回之牲畜改為抽稅二十分之一其緞布皮張則十分抽一外番商人販來牲畜改為抽稅三十分之一其緞布皮張則二十分抽一若牲畜貨物不及抽分之數馬一匹抽一騰格大牛一頭則二十五普爾小牛一頭半之大羊一牽稅十二普爾小羊一牽亦半之雜項物件視

其值之貴賤折收騰格普爾

回地錢名曰普爾以銅為之五十之數為

一騰格

至乾隆二十八年駐劄喀什噶爾大臣永貴

奏布魯特回民到烏什貿易物件請照喀什噶爾之例收稅報可

二十五年議除粵海等關一切規禮名色戶部覆准兩廣總督李侍堯等奏言查粵海關外洋本港商船貨物出入向來除按照則例征收船鈔之外另有官吏家人通事巡役人等規禮以及分頭担

頭等項銀兩節經奏報歸公而則例冊內仍照從前開報各項名色分別臚列誠於體制未協茲彙併核算統作進口出口歸公銀兩各若干將一切規禮火足開倉驗倉放倉押船貼寫小包等名色悉行刪除改正至大量領牌原與收稅章程無碍毋庸過為更易其分頭担頭等項統作一條造報至於各口規則皆查明歷年收稅冊檔分別等次開造以杜弊竇又查省城大關以及虎門潮州雷

州瓊州各口向有書役家人收作飯食舟車等費  
悉作歸公造報統俟核覆奏准刊刻頒發各口永  
遠遵守繁冗既刪名目亦正洵足清稅款而杜弊  
端應如該督等所奏悉行更定仍將更定條款刊  
榜曉示畫一征收從之

二十七年嚴禁權關漏稅積弊大學士公傳恒等  
議覆兩江總督尹繼善等奏言各關權務定有則  
例凡一應官民船隻但有應行納稅貨物俱循照

定則征收其討關陋習久經嚴禁但行之日久不無懈弛應再行各關監督實力奉行至各省

貢物船隻關口向不查驗其間家人船戶不無藉端私攬客貨冀圖漏稅情事該督等請將

貢物開單用印文知會關口查驗此外貨物均令納稅亦應如所請辦理從之

又准江蘇撫臣所奏清釐浙關積弊四條戶部覆准江蘇巡撫陳宏謀條奏浙墅關近日情形清釐

積弊四條一澣關向有鋪戶代客完稅包攬居奇  
節經禁革乃旋革旋復陽奉陰違現且派定地方  
如江西湖廣上河下河船由何處開來稅由何鋪  
戶包納與在關之家人書役通同一氣遂致正稅  
串改罰項舞弊無窮應請將包攬鋪戶盡行列榜  
禁革仍令商人自行完納按簿親填一各處關口  
貨船抵關官役到船簽驗按則納稅方許過關惟  
澣關先不簽驗多寡聽其自報納稅之後船已過

關方始簽驗名曰倒住因而鋪戶奸商僥倖漏稅  
營求免罰分肥者亦復不免嗣後貨船到關令委  
員帶同丈量人役查驗簽量令其赴關納稅給票  
之後始准過關以杜偷漏一江南各關口俱有坐  
關之員遴委佐雜半年一換惟浙關委員四人向  
係久管不換相習日久漸滋弊竇應請嗣後將浙  
關委員已過半年即遵照乾隆十七年前撫臣莊  
有恭原奏更換不得任其戀缺致啓弊端一督撫



於關稅監督原應相助為理惟是每月所征關稅  
數目各處監督均不咨明督撫及至缺稅交查事  
在一年之後客商四散簿籍難憑多寡之數無從  
稽核應令管關監督按月知會督撫仍於年滿奏  
報時將一年總收數目統行咨會至龍江淮安兩  
關歸兩江總督稽查許墅關歸蘇州巡撫稽查辦  
理庶就近分查責成益專於關務更有裨益從之  
二十八年飭天津各關口稅則畫一辦理戶部議

覆天津關監督達色奏稱各關分設口岸原以防  
奸商之遶道漏征其一切稅則自應遵照大關部  
頒條例畫一征收以免避重就輕之弊今天津苑  
口等十三口岸每貨百觔每布百尺較大關稅則  
互異自應俱按津關部頒則例改正征收以昭畫  
一從之

又議准山東豆石由海運赴浙販賣山東各屬產  
豆素多向例許從海口運赴江南久經奏准遵行

其浙省未據奏明一體辦理是以東省豆石從前並無運進浙江海口販賣之例至是浙閩總督楊廷璋等奏稱黃豆一項浙省需用甚廣應照運江之例一體通商接濟俾兵民均有裨益部議應如所請准其將東省豆石聽商由海運浙發賣以資接濟其商船運到各府即准其由鎮海關乍浦海門汎東關汎等處收口所有經過關口應納稅銀應令一體照例輸納填入該年部頒印簿送部查

核至出口進口驗票繳票一應設法稽查之處均應如該督撫等所請從之

定伊犁地方舖面房間分等收稅將軍明瑞奏伊犁地方舖面房間分等收稅從之

又定哈喇沙爾地方舖面收稅例駐劄哈喇沙爾大臣達桑阿奏該處商民開設舖面共四十間量大小作為三等收稅從之

又定闢展地方收稅例闢展辦事郎中德爾格奏

開展吐魯番魯克沁等處地方凡售買馬匹牲畜  
照內地例給票每銀一兩上稅銀三分奉

旨照所請行

二十九年定烏魯木齊市易上稅例駐劄烏魯木  
齊大臣旌額理奏烏魯木齊地方買賣馬匹牲畜  
請照開展之例俱行給票每兩上稅銀三分奉

旨允行又阿克蘇地方奏買賣牲畜亦照此例每普爾  
一百文收普爾三文報可

又更定臨清關商稅征鈔名色山東巡撫崔應階  
奏稱臨清關稅務自雍正六年部頒則例各項貨  
物應征稅銀俱開征鈔幾貫字樣如緞疋每疋鈔  
二十八貫船料每丈鈔七十五貫如此等類分別  
數千百條僅於則例尾頁註明鈔每一貫折銀三  
釐一毫七絲三忽字樣一時頗難明晰商客過關  
不能通曉則例即目覩則例亦不知幾十萬貫需  
銀若干必須按數折算經書有意模糊藉此可啓

多收侵沒之弊臣愚擬將商稅論鈔論貫之數概行刪去其各項貨稅照每貫折銀若干核定應征銀若干確數載入例冊送部較正刊刻木榜設立關口庶商客易遵經胥不致弊混從之

三十年更定吉林等處征收稅額戶部議吉林等處稅銀自乾隆十六年題定吉林額征馬畜雜稅銀一千六百五十兩木稅銀三百七十兩寧古塔額征稅銀二百八十兩遇放參票之年征稅四百五十兩伯

都納額征稅銀二百七兩至拉林阿爾楚喀二處乾隆二十五年奏准試收每年征收稅銀二百四五兩不等今據吉林將軍恒魯奏以吉林寧古塔生齒日繁貿易益盛派委旗員協同同知徵收稅銀較多於前分別酌定稅額應如所請吉林雜稅以一千七百八十兩為額木稅仍三百七十兩寧古塔添收木稅以一百五十八兩為額雜稅每年儘收儘解遇放參票之年以九百十二兩為額伯都納稅銀仍以二百



七兩為額拉林稅銀定以七十二兩為額阿爾楚喀稅銀定以三百三十八兩為額從之

又裁潘桃口監督缺所有稅務歸併張家口監督管理其潘家口所管六小口改歸通永道征收

三十一年以潘桃口木稅令多倫諾爾同知管理直隸布政使觀音保奏大河口地方距張家口五百餘里張家口監督不無顧此失彼之虞可否將稅務就近交多倫諾爾監督或交多倫諾爾同知

魚管抽收工部議以領票商人係多倫諾爾居民該同知身任地方撫綏勸導商情易協應請將潘桃口木稅事務交於多倫諾爾同知征收從之

三十四年奉

諭自來硫磺出入海口俱有例禁原為磺觔係火藥所需自不便令其私販若奸商以內地硫磺偷載出洋或外來洋船私買內地硫磺載歸者必當實力盤詰治罪乃定例於洋船進口時亦不許其私帶殊屬無

謂海外硫磺運至內地並無干碍遇有壓艙所帶自  
可隨時買備於軍資亦屬有益何必於洋舶初來多  
此一番詰禁乎嗣後於海船出口時切實稽查不許  
仍帶磺觔以防偷漏之弊違者究治其各省洋船入  
口禁止壓帶硫磺之例概行停止著為令

臣等謹按軍資火藥最重磺觔慮奸民私販傲利  
自不得不嚴加譏察故凡商船出口及番船歸洋  
時與絲粟銅鐵同一例禁其由海外運至內地者

向亦為之嚴詰不許其携載入口於市舶情形殊多未便我

皇上聖謨深遠准其壓帶禁令則弗使煩苛商販則咸資利益法良意美斟酌盡善防奸之道無不至柔遠之政茂以加矣

四十二年戶部言打箭鑪界近邊陲嗣後稅差請照山海等關之例於宗人府正副理事官及各部院郎中員外郎等官內揀選保送庶於權務彈

壓有裨得

旨允行

又奉

諭戶部奏查核揚關征收稅銀較雍正十三年短少三萬二千六百餘兩請着落經管之道員孫枯賠補一摺因命軍機大臣交戶部查該關歷年盈餘之數較雍正十三年多寡若何今閱單開各年盈餘數目惟乾隆十四十七兩年較雍正十三年有贏無絀其餘

各年則節次短少並非始自近年各關稅課盈餘例  
興工屆相比較朕御極之初本不知各處所收關稅  
多寡之數因諭部臣即以雍正十三年為準使胥吏  
不敢例外苛求監督不能征多報少且使每年比較  
不致歲漸加增加減無所底止實於體恤商民之中  
寓司關稅者不致作弊剋減之意並非因雍正十三  
年關稅獨多使各關稅必足其數也乃行之未久部  
臣因各關奏報盈餘較雍正十三年有贏者居多若

置上屆於不問恐監督以比舊已多即可從中侵隱  
易滋流弊請仍與上屆相比較又復通行日久昨歲  
考核淮關鳳陽關較上屆屢形短絀因令復照雍正  
十三年比較則所短之數更多自係辦理不善今揚  
關亦復節年短少且通計短少最甚者惟此三關若  
因此而徧及諸關未免窒礙且恐無識之徒疑朕於  
關稅必欲從其多者相核實不知朕體恤商民之本  
意矣朕有意於帑項增多則不三次通免天下錢糧

其所增益不較此百倍乎又思乾隆二十八年臨清關征收盈餘較二十七年短少朕曾諭戶部令與二十五六兩年再行比較嗣經部臣奏稱該關盈餘之數雖較上屆少銀三萬餘兩而較之五六兩年尚多銀一萬五千餘兩即予免議蓋課稅盈縮率由於年歲豐歉固難免參差不齊而通計三年即可得其大槩若多寡不甚懸殊原可無庸過於拘泥此法最為平允嗣後各關征收盈餘數目較上屆短少者俱著



與再上兩年復行比較如能較前無缺即可核准若  
比上三年均有短少再責令管關之員賠補彼亦無  
辭夫朕以雍正十三年為準者本屬美意今既有此  
求全之毀嗣後此例不必行所有揚關本年比較盈  
餘交該部照此例另行核議具奏並將此通諭知之  
四十五年奉

諭向來荆關打箭鑪兩處征收稅務俱派部院司員前  
往管理一年報滿更換但派往之員人地生疎又或

經理不善往往易致缺額按例既不可不令其賠補而該員等因一二年小差以致折變房屋賠繳官項非所以示體恤雖該員等賠項每加恩豁免而於帑項公務究屬無濟所有此兩處稅務由京派員前往之處竟可不必其業派往者俱着撤回嗣後着交該督撫照臨清等關之例派委妥員奏明管理

四十九年免粵海關珍珠寶石等稅

詳見市  
糴考

皇朝文獻通考卷二十七